



YANÜARI 2015

# PERSEVERA

UN PÁGINA DI KURASHÁMENTU I GUIA SPIRITUAL PA  
MIEMBRONAH DI SCOUTING ANTIANO

EDISHON 48 AÑA 4



## MI POR KONFESA DIREKTAMENTE KU DIOS SIN NESESIDAT DI UN PASTOR?

Hopi hende ta kritika e hecho ku nos katólico tin obligashon di bai konfesá nos pikanan. Nan ta hasi burla i bisa "...konfesá ta ko'i këns, mi no tin mester di bai bisa ningun pastor mi pikanan, kiko nan sa? Ken nan ta kere nan ta pa tin e poder di pordoná mi pikanan?...ami no tin mester di bai bisa ningun hende mi pikanan pasobra ami ta konfesá direktamente ku Dios i E ta pordoná mi!..". E proseder aki no solo ta infantil i ignorant sino ku e ta un eror mortal! Si bo no a konfesá bo pikanan ku un pastor, na ora di bo morto nan lo ta p'abo manera kadenanan di heru ku lo marabo na morto pa semper! Por ta bo kier sa anto kiko enbèrdat ta konfeshon?

Konfeshon ta e sakramento di penitencia ku Hesus mes a instituí pa pordoná e pikanan ku a wòrdu kometé despues di boutismo, e ta parti di e 'designio' di Dios pa pordoná nos. No ta suficiente konfesá nos pikanan direktamente ku Dios pasobra Hesus mes a konferí e apóstelnan (su pastornan) e poder di pordoná pikanan (Mt 16,19). Esaki ta e poder ku Dios a duna Pedro i Su susesor nan, di deklará kiko ta permití i kiko no ta permití na nivel di henter e Santa Iglesia Katólico; e poder di apartá di e komunion eklesial (ekskomunion) i e poder di atmití bék den dje (komunion). Esaki ta impliká tambe e poder di pordoná pikanan den nòmber di Dios. (Mt 18,15-18) E ta e mes un poder ku ta presente den kada komunitat eklesial ku ta presidí pa un obispu òf un pastor. Si bo ta kere eskritura .....kere esaki tambe anto "Si boso pordoná un hende su pikanan, nan ta keda pordoná; si boso no pordoná e pikanan, nan no ta keda pordoná!"(Jn 20, 21-23) Si bo lesa e sita aki ku atension bo ta ripara ku Hesus ta vinkulá konfeshon ku resurekshon (Su viktoria riba morto), ku Spíritu Santu (nesesario pa kere i aktua ku poder), i ku e apóstelnan (e promé pastornan).

Ruman, wak bon pa bo nunka bisa "mi ta konfesá direktamente ku Dios pasobra E konosé mi bon i E lo pordoná mi"...si ta asina anto, ta sin motibu Kristu a bisa "tur loke boso mara na tera lo keda mara na

shelu"....ta sin motibu tambe anto ku Hesus a duna Pedro e yabinan di shelu? ( Mt 16,19).. bo kier hasi e Evangelio inútil?...bo kier hasi e palabranan di Kristu bashí? Kada bes ku un persona ta apartá su mes di e iglesia ku Kristu a funda pa bai hasi su "mes" iglesia, e no ta konta mas ku e poder aki di Spiritu Santu ku ta transmití solamente a trabes di e imposishon di mannan di apóstel. E ta un liña direkto ku Dios a establecé a trabes di e promé apóstelnan i ta transmití solamente a trabes di suseshon apostólico. Es desir, e poder ku pastornan di awe ta haña ta bini di e mesun Spiritu Santu ku Hesus a supliriba su apóstelnan dia di Pentekostes i a keda traspasá pa medio di imposishon di man di generashon pa generashon (suseshon apostólico).

Wak bon anto i no sea inkrédulo òf rebelde i bai serka un pastor i konfesá, mustra ku bo ta obedesé Kristu. Dios so ta pordoná i salba, i ta Dios so tin e autoridad pa establecé e medionan nesesario pa otorgá nos e pordon. Pa motibu ku Dios ta stima pekadornan E la bini mundu pa biba mei mei di nos; pa motibu ku nos konfesá nos pikanan nos por bai shelu i biba mei mei di Dios.

Tempu di kuaresma ta un tempu mashá oportuno pa nos hasi nos konfeshon sakramental. Den tur nos parokianan promé ku selebrashon di Santu Sakrifisio di misa lo tin oportunidad pa konfesá. Kòrda ku konfeshon ta un enkuetro ku Hesus miserikordioso, ku no ke pa ningun di nos bai pèrdí, ma tin bida eterno.

Konfesá frankil.

